

SCRIPT OF MORNING GOJRI NEWS BULLETIN 28AUG 2026 1015HRS

مارنگ گوجری نیوز بولٹن 28 اگست 2026

یوہ آکاشوانی جموں ہے محمد اکرم تیں خبر سُنو۔

PM JAN DHAN YOJANA

پردھان منتری جن دھن یوجنا نے اج 12 سال مکمل کرلیا ہیں ۔ یوہ ملک مانہ مالی شمولیت نانہ فروغ دین غی جانب ایک اہم سنگ میل ہے یہ سکیم وزیر اعظم نریندر مودی نے 2014 مانہ اج ہی غے دن شروع کی تھی۔ پردھان منتری جن دھن یوجنا غے تحت ہُن توڑی 59 کروڑ تیں زیادہ بینک اکاؤنٹس کھولیا جا چکا ہیں۔ جد کہ ان اکاؤنٹس مانہ مجموعی طور ور 3 لکھ 17 ہزار کروڑ روپیہ جمع ہیں ۔ اس سکیم کا نتیجہ مانہ بھارت غا فنانشل انکلوژن انڈیکس 2018 مانہ 53.9 تیں بدھ غے 2026 مانہ 67 ہو گویا ہے۔ جہیزو قرض ، بیمہ ، بچت تے ڈیجیٹل ادائیگیاں توری عوام غی بہتر رسائی نانہ ظاہر کرے۔

CM QUALITY HEALTH

وزیر اعلیٰ عمر عبداللہ نے جمعرات نانہ کہیو ہے کہ شہریاں نانہ معیاری صحت غی دیکھ بھال فراہم کرنو حکومت غی بنیادی ذمہ داری وچوں ایک ہے۔ تے اس دوران جموں تے سرینگر تیں بار اچھا معیار غی بنیادی صحت غی دیکھ بھال تک رسائی نانہ یقینی بنان ور زور دتو گیو ہے۔ تے روزہ کواٹرلی ، ہیلتھ کیئر اینڈ ریسرچ سمٹ چوتھی جموں کشمیر بین العوامی کنونشن مرکز سرینگر مانہ اُنہاں نے اس گل نانہ یقینی بنان ور زور دتو کہ جموں کشمیر کا مریضاں نانہ جدید علاج واسطے جموں کشمیر تیں بار سفر نہ کرنو ہے۔ اُنہاں نے صحت غی دیکھ بھال غی ایک متوازن حکمت عملی ور زور دتو۔ جہیزو جموں کشمیر مانہ مضبوط بنیادی ڈھانچہ تے ثانوی صحت غی دیکھ بھال غی خدمات غے نال اعلیٰ درجہ غی چوتھائی نگہداشت غی ترقی نانہ یکجا کرے۔

RAKSHA BANDHAN

رکشا بندھن پین پائی غو خاص رشتہ غو تہوار ہے تے اج ملک بھر مانہ جوش و خروش غے نال مناویو جارہیو ہے۔ اس موقع ور پین اپنا پائی غی کلائی ور رنگ برنگی ، راکھی بدھے غے اُن غی خوشحالی ، صحت تے سلامتی غی دُعا کرے۔ اس غا بدلا مانہ پائی اپنی پیناں غی حفاظت تے ہر ممکن مدد گو وعدے کرے تے اُنہاں نانہ تحفو دے۔ جموں مانہ وی رکشا بندھن گو تہوار جوش و خروش غے نال مناویو جارہیو ہے۔ بازار راکھیاں ، مٹھائیاں تے دیگر اشیائ تیں سچی وی ہیں۔ لوک ، خاص طور ور بچہ تے نوجوان، تہوار غی خوشی مانہ سویرے تیں پتنگ اڑا رہیا ہیں۔

PREZ, PM, LG WISHES

صدر جمہوریہ دروپدی مرمو نے رکشا بندھن غا موقع ور عوام نانہ مبارک باد دتی۔ صدر جمہوریہ نے کہیو کہ رکشا بندھن قدیم زمانہ تیں ملک غی ثقافت تے روایات گو ایک اہم حصو رہیو ہے۔ وزیر اعظم نریندر مودی نے اج رکشا بندھن غے موقع ور عوام نانہ مبارک باد دتی۔ سماجی میڈیا ور ایک پوسٹ مانہ وزیر اعظم نے اُمید ظاہر کی کہ رکشا بندھن سب غی زندگیاں مانہ خوشی، خوشحالی تے کامیابی لباوے گو اُنہاں نے دُعا کی کہ محبت، شفقت تے باہمی اعتماد غو رشتہ ہمیشہ مضبوط تے اٹوٹ رہیو۔ لیفٹیننٹ گورنر منوج سنہا نے وی رکشا بندھن غا پُر مسرت موقع ور عوام نانہ دلی مبارک باد پیش کی۔

AMARNATH YATRA

جموں کشمیر مانہہ اج سالانہ شری امرناتھ جی یاترہ رکشا بندھن گا تہوار گا موقع ور اختتام پزیر ہوئی ہے 57 دن توڑی چلن آلی یاہ یاترہ اس سال 3 جولائی نانہہ شروع ہوئی تھی۔ یاترہ گا اختتام نانہہ مقدس چھڑی مبارک گا پُجن ور نشان زد کیو گیو ہے۔ جس غی قیادت مہنت دبندر گری کر رہیا تھا۔ اس سال پہلگام تے بالٹال دواں رستان ور 4 اشاریہ 8 لکھ تیں زیادہ عقیدت مندان نے یاترہ کی ہے۔ جموں کشمیر گا پونچھ ضلع مانہہ سالانہ بڈھا امرناتھ یاترہ اج اپنا اختتام نانہہ پُج رہی ہے۔ شراون گا مہینہ مانہہ منعقدہ ہون آلا 42 روزہ یاترہ غے دوران یاتری جموں تے کشمیر غے نال نال پونچھ ضلع مانہہ بابا بڈھا امرناتھ مندر مانہہ عبادت واسطے جیں۔ پونچھ ضلع غی تحصیل منڈی گا راج پورہ گراں مانہہ واقع بابا بڈھا امرناتھ مندر بھگوان شیو واسطے وقف ہیں۔

PM MAN KI BAAT

وزیر اعظم نریندر مو دی مُلک تے بیرون مُلک رہ رہیا بھارتی شہریاں سنگ آئندہ 30 اگست نانہہ سویرے 11 بجے آکاش وانی ور من کی بات پروگرام مانہہ اپنا خیالات سانجھ کریں گایاہ ماہوار ریڈیو پروگرام غی 137 ویں قسط وے غی۔ یوہ پروگرام آکاش وانی، دور درشن، اے آئی آر نیوز ویب سائٹ تے نیوز آن انر مو بائل ایپ ور نشر تے ٹیلی کاسٹ کیو جائے گو۔ اس توں علا وہ یوہ پروگرام اے آئی آر نیوز، ڈی ڈی نیوز تے وزیر اعظم گا دفتر تے اطلاعات و نشریات غی وزارت غا یوٹیوب چینل ور وی براہ راست نشر تے ٹیلی کاسٹ کیو جائے گو۔ آکاش وانی اس پروگرام غی ہندی نشریات غے فوراً بعد اس نانہہ علاقائی زبانان مانہہ وی نشر کرے گو۔
